

日麗  
書堂集

曠書堂詩鈔

卷上

五言古五十首

七言古二十三首

五言律四十五首

卷下

七言律一百三十首

五言絕句十六首

七言絕句一百二十八首

五言排律二首

七言排律二首

試帖四十首

詩餘三十八闋

和鳴集四十六首

附  
王太夫人祭財神七言絕句十首

曠書堂詩鈔卷上

棲霞郝懿行蘭皋

五言古

讀秦皇本紀

壯哉秦皇帝  
吞滅杖鞭箠  
殺人如草菅  
阨焚禁毀詆  
因作阿房宮  
膏血塗階阨  
積骨爲長城  
邊聲不敢起  
豈曰無仁恩  
二羊六石米

歎劉項

漢王破彭城  
將五諸侯兵  
置酒日高會  
美人楚歌聲  
豈

知重瞳來勢若驟雨傾漢軍二十萬穀水流縱橫假令  
破城後戰勝如持盈項氏頭可斷誰與分杯羹驕泰以  
失之功怠於垂成嗚呼運籌者千載稱良平

鷹相食

爾本爪距利天資復貪酷罔恤同類情偏縱搏擊欲草  
枯木葉稀眼疾幽隱矚雪中抖精神狡兔起山麓脫韁  
羽箭馳呼聲震林木蕭蕭北風鳴天意助殺戮兔奔喘  
未定爪已破其腹鮮血濺石根哀鳴動山谷鳳皇去茲  
遠痛楚向誰告雉是文明禽亦復遭荼毒燕雀畏影逃

怒目還追逐種種兇惡狀擢髮難更僕豈意見殘傷殘  
傷乃同族昔日分汝甘今日啖汝肉嗚號聲亦哀殘喘  
僅絲屬迴憶厲吻時情形頓反覆物理良可畏循環何  
太速岸上信天翁知足永不辱

林翁卻金

西門有林翁翁居近負郭跡寄城市間心存田園樂其  
家傭工人墾土光閃爍不以充私囊與翁翁乃卻堪歎  
古誼衰嗟哉世情薄偶爭錐刀利骨肉相銷鑠林翁不  
知書胸衿自揮霍有田故豐饒無金不貧約管寧與華

歎高風差相若

前邑令楊公匾其門曰義高管華

遙望城頭霞朝暉永

灼灼

翁名復初字明善邑中無少長呼之林善人家又素  
豐卻金事固優爲之乃其傭人臨財不苟有古廉士  
之風深可嘉歎惜其姓名不傳耳嘉慶十二年十一  
月十一日奉

上諭據步軍統領衙門奏稱有陝西商販回民馬貴呈  
報在廣寧汛小井地方遺失銀四百兩旋據民人呂  
有年帶領伊甥張自得將拾獲原銀赴營稟報驗明

無缺等語張自得以鄉曲小民拾獲道遺多金不敢  
隱匿告知伊舅呂有年慮及失金之人生計攸關亦  
卽赴官呈報該民人拾金不昧重義輕利風俗醇良  
深堪嘉予著將原銀內賞給呂有年張自得一百兩  
再加賞官布各二疋竝著地方官製給匾額以旌其  
廄餘銀給失物之人領回欽此謹案二事正同竝可  
見俗美風淳人心之樂於爲善也因竝記焉

題梅菴

朝來花下遊暮去花間宿夢裏聞清香香雪藉茵褥不

敢開湘簾恐被惡風撲借問溫柔鄉何似梅花屋

雲山

山靜時出雲雲倦復歸山山缺牽雲補雲斷借山連欲  
雨雲冠山旣晴山帶雲雲山本相合歎被惡風分山深  
仍漠漠雲散各紛紛山雲終相戀此意無人見

曉行四首

殘月在高樹征鐸驚棲禽芳塵馬蹏輭不覺過前邨豈  
不畏夙夜而甘多露侵

長路何漫漫良苗正油油凌晨葉露滴新色翠欲流歸

去正食新農言麥已秋

行行過西疇  
遞迤東皋下  
前有戴星人  
乃是荷鉏者  
婦  
日子夙興觀我田  
多稼

煙林行不遠  
林盡至前邨  
乃見一老叟  
埽地啓柴門  
雞犬繞街散  
牆頭上朝暾

夏日

長日儘倦人  
散步閒庭裏  
樹影滿空階  
重重埽不起  
因念紅塵中  
驛驅騁未已  
高臥北窗人  
於今在栗里

霖雨十二章

乾隆丁未六月雨至七月爲農人見憂而作特  
取韓詩雨無其極傷我禾稼二語冠於篇首

雨無其極傷我黍稷神不其餒民于何食

雨無其極傷我稷黍歲時伏臘何酷何醻

雨無極兮傷我豆兮草盛苗稀如何擇兮

清曉荷鉏易我園蔬老妻進言子姑徐徐青苔路滑勿  
蹶勿趨有童閑閑有女娟娟摶衣褰裳推波助瀾瞻彼  
中庭如臨于淵老翁扶杖倚門而望童孫數人在河之  
濱懼河之圮驚我孫子天公實難時而不雨民曰旱乾

雨旣勤止民復咨怨誰云造化而得人歡

竈蛙趯趯釜魚儻儻彼水蟲兮胡居我屋壞我牆垣漂我薪木瞻彼棲苴胃茲蓬戶

蓬戶悠悠載沈載浮憎茲蚯蚓出戶而謳匪惟謳止逝且遊止汝實樂止誰當憂止

夫須笠兮草爲蓑兮驅彼黃犢青草坡兮河將決兮犢不可擣兮呼嗟犢兮傷如之何嗟復嗟兮公無渡河

稻則有芒蟹亦有匡稻生黍死蟹喜蠶傷黍喜高寒  
蠶惡下溼吁

嗟無黍兮曷嘗吁嗟嗟無蠶兮曷裳

明書詩金卷

三

雲起西郊逡巡而雨嗟汝雲兮甯莫之禦大風起兮逝  
將驅汝杲杲出日勿潤我礎

萊州道中

連天山不斷近海風多寒獨行已爲苦况復值秋殘孤  
蓬轉路側落葉辭林端豈止傷搖落兼憂行路難

月夜

當天懸明月物象咸光昭萬葉浮金碧千林靜調刁皎  
皎北堂戶流光入綺寮簾紋凝冰色拂之不能消徘徊  
下庭除石棱削瓊瑤銀鑰聽未闢萬戶正蕭條五蘊洞

虛空冥冥問參寥

拾海錯 海邊人謂之趕海

大化何齋淪決漭無停止天地混沌日滄海何時起一  
碧渾涵間今有太古水潮汐割昏曉如斯夫不已月滿  
魚腦盈月晦蟬胎死漁父攜筠籃追隨者稚子逐蝦尋  
海舌淘泥拾鴨觜海舌卽水母  
鴨觜形如鴨觜細不遺蟹奴牽連及魚

婢生物供人用造化意如此鯢鯨在其中芥子須彌耳

圓窓時一望晉書天文志東海氣如圓窗

磨青幾萬里

女蘿行

女蘿附櫓木開花不芳潔好女居桑中身名不貞烈昔  
有貧家女嫁於羽林兒未御羅綺裳不解脂粉施甘心  
操井臼守分炊扊扅良人麌酒肉身自餚糟醕鄰家冶  
遊輩交口稱淑姬良人當遠調踰時不歸來行者易裘  
葛居者守簿帷行者日以遠居者石不轉忽然過鄰家  
鄰家多狹邪日間貿絲布夜間爲寄緝解爲治由笑解  
塗絳朱脣笥中疊綺縠廚下羅芳珍朝遊柳陌頭暮宿  
桃花津豈曰無芳草芳草須芳鄰

山田行

昔余方嬉戲耕田在平地今未三十年耕田在山巔山  
田高於屋屋上驅耕犢田萊日益開生計日益蹙地利  
原有盡人生齒漸繁寄語催租吏莫斂貧兒門

勵志

五日不讀書筋力欲衰老十日不作文心思已枯槁常  
恐名不立青春去人早鉛槧無虛陳經訓恣蒐討况偕  
素心人疑義相與考偶然窺新境朗若覩清昊孜孜入  
編記日久成初稾時余方與婉金輯詩問敢云希古人亦曰敦宿  
好

書帶草

我友周麟之貽我書帶草端容再拜受嘉名允爲寶思人愛其樹茲物洵美好築土培根荄開池酌溼燥灌以德日新滋以青未了漢末章句儒門戶競紛擾細大各爭流其究爲行潦鼠穴強鑽研冤絲自纏繞坐令聖賢心瞢彌雲霧表所以數百年重昏殆無曉一旦北海濱青天出日杲蹶厥生康成長駕煙塵埽衡馗剗棘荆林木摧枯槁渾灝納百川靈奇孕三島藝圃爰蓄奮書林乃搜討上溯帝羲軒下迄王豐鎬不其開講席禮堂窺

窈窯東道兼齊魯北學空燕趙乃有庭階前豐草何嫋  
嫋紛綸一萬卷龍葱鬱紹繚經笥資披拂綏文罔新巧  
雨浥映箋注風吹解衿抱迄今二千年青青尙未老豈  
曰莖根堅惟有神是保辱余小茅齋珍若贈吳縞夙夜  
敬佩之學殖憂不早榮華非所懷此草未見花香荒落反其  
道生意自欣欣清標殊矯矯經神或見夢彩筆舒文藻  
我欲書之紳後世有以考

祭外姑

千秋感知遇難孤國士恩東牀近五載倏已瞬音塵外

姑遭閔凶廿六失所天孀母攜孤女形影相依憐訓養  
兼恩誼詩禮數晨昏治家尚嚴肅秉心惠且溫迄今三  
十年傳誦徧六親行本窮途子落魄守蓬篋維時年旣  
壯孤鴻尙求匹蒹葭託青雲有惠賜之室恆督作文字  
延師爲評薦飲食兼教誨殊難罄口筆何圖沈疾嬰埃  
風遽上征吁嗟今已矣莫誠何日傾況復遺孤女顧影  
悲零丁微風動纏帳鬢髮間音聲痛因過時積恩由感  
念生碧海深無底之采高不極我無筆如椽何以銘大  
德

寒蛩篇

棲霞耆宿欒風南先生之仲子婦王氏于歸三  
載失所天年甫十九奉養衰翁備嘗艱苦今嘉  
慶丁巳之歲上距夫亡二十三年矣先生高其  
義取季子之嬰兒命氏鞠之親題木主立以爲  
嗣一時傳誦形諸咏歌因爲茲篇以紀其事

寒蛩咽空壁孤鷗棲舊林良人隔重壤之子多苦心應  
門無尺童高堂愁一老豈惜軀命捐願代子承考自言  
寒閨女未熟內則篇紉箴奉滫瀡親串俱稱賢粉書字

不滅鸞鏡影長別奉養三十年瑤池鑒冰雪冰雪有消  
時丹青無變期君舅曰阿婦阿婦卽阿兒嗷嗷林鳥哺  
淒淒寸草句志向黃泉盟心偕白日訴白日照燕門黃  
泉泣鵲魂淚枯藁碭墓心惜桑榆暄人生寄隙駒年命  
如蕉鹿千載標清風清風在綠竹

常棣篇

有敘

左傳有言召穆公思周德之不類故糾合宗族  
於成周而作詩然則常棣詩者召穆公之所作  
也不類猶言不肖也糾合言其離散也每讀是

篇令人友悌之心油然而生乃知詩之可以興  
也壬戌暮春感念先人心傷不類長歎昔  
賢糾合之難忧然爲戒他日造爲此篇書之座  
右並示二弟懿林云

韓韓道旁華同類共榮悴如何凡今人根同而末異一  
十指有短長分居各一方忽然遭虧損慘痛摧肝腸二  
鴻雁離矰繳帶箭歸林薄烏鳶或相悲鸚雀已相樂三  
猛虎攫人去齧臂弟代兄酒食生嫌怨睚眦共鬪爭四  
華妍復解語鷺嬌更巧嚦前時帶箭雁今日飛東西五

姬姜如絲麻漚漸分清濁臧獲顛頓輩何故工謠詠

六解

謠詠日益尋蕕芥日益深昔爲脣與齒今爲商與參

七解

兄競南園桑弟爭北園柳父母生兒時桑柳皆何有  
八解  
築娌有後先本自同室人交近情易離勢遠分益親

蹤跡相與遠性情相與淺百年本須臾何必競長短

九解

鴻鵠篇贈鹿賀谷之官滇南

鴻鵠豐羽毛雲路高翶翔雞鷺處籬落翹首睨其旁君  
家在東海與余爲同鄉束髮受書後相偕走名場君主  
騷壇盟余亦附景光文戰常拔幟聲譽日騰揚馳驅二

十載君遂獨高驥余仍困鹽車躡躅上太行更閱十年  
所始復共韻頌給事尙書省牽絲粉署郎明允君誠擅  
疎拙余自將君著平反績余慙會計長浮沈幾十稔君  
出牧南疆循民間疾苦和緩夙稱良

賀谷素  
工醫

仁風扇梓

棟清水照蘭滄伊余尙局促天海遙相望著書用何等  
溫經備遺忘清貧守故態索米庸何傷君至滇池日第  
一問點蒼金馬碧雞神有無渺茫盛覽張叔輩文學  
開遐方人物及山水竝採入詩囊他時郵寄余爲君舉  
一觴此行近萬里潘鬢新含霜臨歧各言別驪駒踐康

莊努力加餐飯聲播鳴琴堂

清時重治理報最登嚴廊徙官符三丙  
君丙午登賢書丙辰成進士今以丙寅遷官也後會應相當行行君莫顧勉勉余未遑何時賦歸來林泉共徜徉

七月六日冒雨赴署

俗人言織女七夕渡銀河余生五十載未覩星曾過又言此夕近雨淚雙滂沱豈知古織女今老猶情多鮫淚綴珠網絲雨漂秋羅郎官位應宿府史藁分科檄移走旁午文字稽謬譌冒雨驅車馬羸敝奈愁何天街泥又

滑

帝城恩復波我欲理舟楫手中無斧柯我欲汎斗牛海上無仙楂身是農曹輩且復問禾麻今年甘霖足滿篝復滿車公庭少案牘邊方靖干戈公餘飽食後捫腹酣吟哦

自巧夕後一日雨至壘前二日

推翻烏鵲橋倒瀉銀河水烏岷擎淵傾黑雲壓城圮街泥沒馬膺田萊生禾耳所見戴簷人無非張蓋士簷瀑無停流屋漏有故紙昔爲階與庭今爲沼與沚蛙腳交

竈陞螭蜒亂垣墻所望旣晴佳甯言其雨喜天亦眞難爲而人不諒只暘旱生吁嗟淫霖更謗訾請召風伯神衝飈東北起迅埽陰霪天放開旭日晷

秋夜記事

家人半未睡屋上聞行聲  
開門把火看萬籟空虛清又疑  
非人跡競逐走狸貳因何跼瓦裂  
髡髮如人行我室雖懸磬薪米猶關情  
母乃杯蛇影空俾池魚驚閉門卻復睡  
河漢當天橫

反送窮用徐曉初韻

窮乃我之友何因見遺送去須迎富富將受玩弄貧人常得閒富人多不空未辨黃梁炊已覺黑甜夢回頭竟何有爬搔短髮懸豈若囊雖空還餘酒滿甕微醉狂吟詩春禽雜謠哢有時強著書談言亦頗中我友交我久兩情竝愚慙願保歲寒盟一任人譏諷

嘉慶甲戌七月五日同人於萬柳堂集爲北海鄭公生日設祭賦詩紀之兼呈同集諸子

古今如旦暮燕齊猶比鄰天涯聚首日共拜傳經人城南選勝地遲客聽車輪柳條跪垂帽芳草如鋪茵我生

距千載懸弧後一晨余以七月六日生家園傍通德汲古尊經  
神書帶榮階下竹窗懷清新論述有至樂擁書不知貧  
俛仰一頭雪慨然望車塵敢謂同鄉里鑽研情獨親敬  
從諸子後持蔬爲主賓緬想行酒日悽愴歲在辰

答書問

有敘

袁簡齋隨園二十四咏其書倉云聚書如聚穀  
倉儲苦不足爲藏萬古人多造三間屋書問藏  
書者幾時君盡讀余代答之云

讀書如啖肉其味常在腹一嚮或有餘千疊憂不足萬

卷羅心胸定非飽耳目無奈肉如山入山莫空還

還問入山者材多而取寡答言奔且馳輕鞭加快馬到處都畱連臥遊須手寫母云髮蒼蒼秉燭資餘光

詠雪

才過小雪節翩然傾大雪天地微茫間混沌略分別瓦縫無參差觚棱類玉切踐去如不勝恐同過涉滅身在冰壺中骨寒神亦徹纏袍冷復冷狐裘熱更熱願教積雪化爲銀大千世界無貧人或爲絲絮軟且溫衣被普天少寒門快哉裘袞紅塵盡一埽渾如太初太素氣顚

顥

買竹行

有敘

移居齊魯會館之明年六月中買竹數十竿樹  
之讀書舍後越四旬餘稍抽細筍碧潤鮮新庶  
少延清賞詩以紀之時丁丑初秋廿二日也

小住如逆旅底事空殷勤雖曰非吾廬何可無此君北  
地風高寒種樹徒紛紛燕人種竹如種玉背秋涉冬葉  
不綠縱無渭川千萬竿此間得趣已足維時月在未  
穀貴竹亦貴爲博檀欒姿何惜四千費今年遭旱乾植

物傷凋殘二日呼水灌三日爬土看兒童慣好事日來  
報平安客入門先喜娛目青琅玕東鄰有鍛者母乃嵇  
叔夜礎聲無了時聒耳如同舍我客厭譁囂欲遷寄公  
駕我謂奚必然一枝亦偶借天地區廬幾由旬古今傳  
舍更多人但使吾居少有竹何妨終朝食無肉四五十  
竿雖言少亦自扶疎繞我屋槿花早榮幕已萎寒蟬秋  
嘶夏登木當前快意聊自娛吾本胸中無此竹

除夕

天上無除日今昔平等觀人間有除夕新故環無端迎

新送故歲情似別所歡唯有除不盡書生酸與寒酸存  
舊風味寒仍故門闌道不離須臾屯利居盤桓旅筵有  
肴核妥神薦春盤春意方款曲

是日立春冬心漸摧殘忽驚

戶剝啄偷從旁隙看知君索債客聽我言艱難客便勃  
然怒語聲譁且謳京官畏三節流年指一彈長安富車  
馬半是貧衣冠鶴軀苦饑瘦蜂紙窮緣鑽胡爲鷄巧危  
而易鳩拙安勸君且飲屠蘇酒祈以黃耆酌以斗樽不  
空歲其有饋年饋煮牢九

是夕北俗多啖  
煮餅卽水餃也

殷勤相邀庚  
申守今日還是尾丁丑明日便爲戊寅首

紀事詩戲作

余家有瓷碗每餐果余腹但求腹不枵何必食有肉微  
物關念比車服策勳頻加賜湯沐家人知余此意藏諸  
珍如韞櫝歲在戊寅春正月廿有六笥益竟羽化湟鹿  
失蕉覆西鄰隔牆誼且譁碗忽來歸自鄰家完璧居然  
復返趙不嘶不破聲不沙嘶破見方言六沙猶嘶也見內則注飛去飛來  
止經宿狡猾誰爲仙姑麻弈綦轉移局靡定塞馬失得  
空吁嗟譬如樹花風飄墮墜茵落溷無不可念余生逢  
盛時誤墨吏議廿年官不移長安索米腹中苦飢九年

艱食迄於今茲亦惟曰怨咨自今飯瓊欣有具喜氣揚  
揚樂不可支稻雪常翻匙從此含哺鼓腹而熙熙加餐  
何不食肉糜

黃花魚

卽石首京師名黃花

我家近東海春早紛魚鰐家家豐鮭菜味不數黃花薄  
宦遊京邸魚貴倍於米黃花味偏佳方悔前誤詆物論  
貴賤有何常惟口於味分低昂海濱山積人不顧名播  
皇都字帶香君不見楚人雉給作鳳皇千金市又不見  
汎陽豕坐客啖名誇肉美世事悠悠盡如此

酬象思齋雨中見懷之作

七月二日

雨後

風颯晚烟涼雨浥輕塵滌竹徑瀉寒泉花間餘點滴此時少情閑披卷苦尋覓心與境爲綠色偕聲俱寂念君驃驛驅嗤我蝸粘壁

附象

作蘿薜搖輕烟支牖對寒碧溼雲凝不流微雨黯

將夕於焉得偃仰隔斷輪蹏迹緬維素心人焚香展  
瑤籍注疏多苦辛誰與分經席

余酬作欲倣其體終不似之因錄以志賞

玩

詠史

史事新豔可喜古書多有增節因倣史公合傳體詮敘其事并論著於篇

昔有呼韓邪竟甯初款塞願言壻漢家漢宮饒粉黛競買圖中人多負畫工債阿誰恃娉婷欲進無媒介良璞羞自獻誤被卞和賣漢帝哀窮窶單于喜歸妹婉彼孔鸞姿竄入鷹鵠隊豈知百年前茲事先有對龍準困平城曲逆弄狡猾畫入閼氏驚圖窮匈奴怪一紙花貌妍十萬雄兵退惜哉此良工姓字竟茫昧班書旣無間桓譚論又晦漢書祇言陳平祕計應劭注始詳師古以爲出桓譚新論今亡或入掖庭間

描寫宮娥態若使匈奴知被欺大索平城誅畫師以罪  
黜閼氏按圖索蛾眉又使漢天子不拘文俗陋由余爲  
秦謀獻女弭戎寇妻敬主和親修好結婚媾當時朝廷  
若不謬策勳應首毛延壽

露坐觀天河

微雲淨如洗河漢明初秋連天波不起當戶聲宵流黃  
姑與織女近水甯無憂院彼匏瓜繫千載空沈浮不食  
豈不念胡弗耕田疇西望天駟騰鳴騶誰爇明火夜嬉  
遊粟帛紛羅市南頭欲問天上將安求一片黑雲擋雨

過急移繩牀屋裏坐

初見雪欣然有作今茲冬煖邈無雪意亥月廿一  
值大雪節風氣陰寒夜未渠央花霽密布霑灑  
庭除開門盈矚積素皓然矣

觀書夜習靜局戶耽深嚴燒燭續殘跋避風輕動簾坐  
久怯衣薄爐寒呼炭添斗然肌生粟未擬地撒鹽開門  
一縱目萬瓦凌飛檐仰眺天欲霽月斜凍明蟾花生卻  
在眼白纏偏依鬢曠如遠行客竭來喜憂兼就涼莫趨  
煖煖處非久淹敢近湯火地而求雨露霑依隱聊守素

因方以爲廉開縛且獨酌訪戴吾猶嫌

病後作

有淚不輕滴無病誰復呻風寒入肌骨頭目昏津津雖  
生不快意恆臥真愁人旣飲散寒藥豁如解囚縛問安  
氣狂喜還乃翁豐鑠今同脫鉤魚昨占噪簷鵠始知平  
爲福無憂便足樂俗士每帶酸逢人輒言寒請看乞丐  
子汝寒豈至此若作如是觀皆當大喜歡辭榮亦辭辱  
知足乃恆足我非談道人我解愛此身雖乏金石堅欲  
忘紛華慕紛華詎能忘偶爾生覺悟暫覺殊難憑且尋

靜中趣問余何能然因病識其故

除夜詞

歲君慘將別形容似愁絕言我與爾居憐爾爲宦拙空有范叔寒而無熱官熱落拓二十年不覺頭似雪老驥櫬還伏睡壺擊應缺但見魚上竿曾微免營穴余聞心未然不如歲君說朱門多近憂黃屋少真悅桑霍方作家樓臺已喋血曾不如豚孤安能及駕劣伊余轍下駒終歲守初轍爲米甯折腰問妻尙存舌雖未矜超乘然亦免傾跌捫腹常熙熙研經亦切切此夕詩客酬詩神

余甘拙宦爲拙人守拙自然樂清貧冷淡生活成閒身  
君不見索債似征討見錢論舊好古今天下市道交廉  
頗將軍悟不早君勿哀我窮錫我永難老八九十歲翁  
何妨任潦倒

箴佞佛

佛出身毒國能了清淨因彼土服其教印度共罽賓不合入東土堯舜周孔鄰遂令有方士化作無業民民生重似續莫大乎君親凡在食土毛普天皆稱臣如何袈裟著公然辯髮落抗不拜人主而且相籠絡雲霧迷香

烟梅檀起綺閣有田不蓄畬供養仰耕鑿名爲優婆僧  
實享王侯樂樂亦祇能及其身何故衣食勞吾人謂宜  
人其人火其書不然彼道其所道吾儒亦自爲吾儒苟  
如是者其庶乎胡乃衣冠薦紳輩辱作沙門頭陀徒噉  
清齋唱梵唄諷南無下膜拜稱弟子願受戒頭有髮心  
無奈衣不緇冠不挂混僧俗真可怪聽鼓趨朝仍作官  
下直聽講攜蒲團讀孔孟書笑酸寒孔子生衰周未及  
西方佛見老稱猶龍見佛豈體屈口不道六如爲顏說  
四勿顏氏雖殆庶屢空了未訖彼教惟了空吾儒及民

物同具慈悲心不爲富貴誑我習儒家言敢云學孔孟  
但挾塵垢囊追隨康成鄭蟲魚苦鑽研老至尙未竟素  
無參禪功亦無談禪病滓穢點太清鄉居心不淨彼我  
更相非儒釋兩無競我自讀我書彼佛焉用佞

歎老儒

歎老儒惟知書道味腴世事疏交如水食無魚書千卷  
室中虛硯耕穫筆蓄畚心稂莠意誅鋤口所道胸無餘  
自怡悅誰共攄挾此術將焉如支離叟不材樗亦曾登  
車赴紫陌待詔金門大射策試官置下第拂衣作歸客

歸客云何傷書聲滿大宅匡衡困經生揚雄守古籍不  
逢識珍人荆璆亦燕石忽膺當途薦學古入服官官宣  
鷁佻巧而獨鳩拙安公子耀裘馬此翁古衣冠彼言良  
有茅爾語蹇復難門前羅飢雀囊中無米看室謫翁乃  
笑晚達聊相寬孔兄久交絕范叔剝一寒官貧事復迫  
不及窮儒歎柳絮隨風飄奚爲自黏著飛蟲挂蛛絲困  
雞且解縛本自蕭散人惟宜置丘壑何苦強作官又非  
被人捉已矣乎賣我車典我襦束歸裝與書俱書爲友  
良不孤無長物亦堪娛謀餉口仍授徒食己力非貪汙

有私累無官逋恆安步免走趨耽高臥絕吏呼遊羲黃  
樂唐虞老農老圃吾不如請從此去爲老儒

七言古

友石齋爲茹古香先生作

先生招飲友石齋多士紛紛趨而來各異鄉縣同門友  
不知姓字共舉杯強語乾笑非款曲石能無言獨免俗  
此中欲辨意已忘相對默默情亦足四面羅列看嶙峋  
如揖如讓旁無人昵交密友孰非假蹀砌此君乃其真  
米家之兄先生友祇此石交可不朽坐中歡讌方高談

我勸此君一杯酒

石友齋爲蘭皋擬作有敘

古香先生以友石名齋余旣作詩紀之他日因  
思余性嗜石自惟卑賤力不及遠然每獲一石  
有小佳處輒數日喜觀玩不釋往六七年屬趙  
蘆洲太守覓汝甯石以非所好久而未獲近前  
年秋就王式菴侍御乞瀘石侍御言其先贈君  
性尤嗜此遊幕所經搜尋殆徧嘗到瀘江募人  
購取厚畀其直所得故多佳者然侍御珍之不

以餉人余再三敦求僅得其不甚惜者凡八枚  
余意少之去年冬復乞得二枚又覓得治玉沙  
磨其石之陂陀者共置一盤注水其中聊資清  
賞私念異時儻力能致遠須構小齋題曰石友  
不能自謂友石也亦作一詩因寄所託

蘭皋不敢言友石且道胸懷自悅懌性類頑石生而堅  
情欣此君愛不釋因思玩石同玩花偏宜雅稱寒士家  
色聲香味兼觸法六者之妙輕豪奢豪奢力雖能兼有  
荆棘胸中那可剖石寒且瘦士亦然相視莫逆乃眞友

共偕晨夕愜素心心在吏隱非山林請改蘭皋作蘭石  
勸汝一杯酒自斟

王侍御家觀瀘石侍御出其贈公卜亭先生所藏  
諸石色態都佳巧構形似詩以紀之兼呈侍御  
東井精絡岷山江渾渾洪洪洚水洚神禹鑿山六丁扛  
迸出碎石流奔瀧漂漱激轉聲搊撞堆積隄岸紛魚矼  
犖駿璘斌瑩如玉月白江清樹映綠半敲蓮葉蟬曉鑿  
蘋梅一枝酡朱顏穠纖淡雅妙寫繪混沌初剖誰狡猾  
恐是媧皇補天餘殘臘零星棄江隅人世塵劫歷千百

不磷不泐完此石成都以東夔府西二千餘里沿江谿  
瀘州以外絕未有精物應歸神靈守帝臺之慕著無人  
玉女投壺事非眞璿珠玉果周滿辱趙璧雖還秦人欲  
物惟珍美招人嫌鬼瞰其家吏非廉不寶爲寶藏可久  
鬱林片石定不朽先生清白遺厥後摩抄汗澤猶在手  
鄭重不敢趨而走竦立整冠拜石友

河邊古塚

薄霧冥冥暗林麓陰風獵獵吹山足松楸寡色日將暮  
啾啾河邊舊鬼哭岸上新鬼聞而笑自古有死甯汝獨

舊鬼聞言忽長歎歎罷欲言先顰蹙昔我宅兆卜高原  
術者建言宜水澳我家子孫竝慈孝厚我絞衾美我櫨  
期以百歲千秋間無使土侵膚與肉一朝河水忽吼怒  
須臾遷變陵爲谷狐狸穴我幽宮門兒童破此長夜屋  
白楊有日摧爲薪宿草無根春不綠遂令善地稱牛眠  
到此殘骸剩骨誰掩覆余聞此言忽有觸孔子曰死而  
朽也不如速身後那復知榮辱由來萬事隨轉燭無定  
河邊百歲髑

花肆行

日聞深巷賣花聲杳然不見栽花地偶因送客過街頭  
或曰此間乃花肆行行纔入扉香風襲我衣蘿陰曲徑  
仄樹杪懸泉飛松柏獨奇古矯若虬龍舞桃李豔芳姿  
燕姬年十五榴花紅映肉不及山躡躅躡躅人不奇榴  
花眾稱之小婢街頭來手撚茉莉花誰家貴公子簷荀  
摘露葩薈荀宜染黃茉莉薰髮香豪門一花草中農十  
戶糧今年長安米價貴

天子曰咨汝發棠安得花肆千萬間爲民倉庾儲粟支  
十年

此工部詩也人學其聲貌此學其肝腸孰爲工部

牟

入

紫橐駝歌

橐駝生於流沙磧形龐骨竦紫花脊其性善能識伏流  
賊蹕千里無人跡龍堆蒲海都經遊誤入中國爲人役  
中國山路皆陂陗水草不及西域多飲乾不時惟人命  
俛首帖耳敢誰何千鈞重任苦難舉脊梁挺著無據拒  
繩穿鼻孔從人牽瘦骨難施紫藤鞭溽暑熏蒸酷炎熱  
白汗背浹口流涎蹶伸膝折行不得毳毛脫落皮無色

肉鞍柔脆痛難勝載實圓鳴聊喘息繩牽鼻斷流朱殷  
揚鞭怒目還相逼仰噴俛鳴氣不伸嗟乎自咎豈尤人  
物惟有欲故可制神龍可參虎可馴橐駝喜啖雪花鹽  
計汝所須亦云廉食人之食供人使驅策不殊大羊爾  
迴首故山黃葉落沙流決漭數千里

慷慨悲歌醉後讀之嗚嗚然

牟默人

古瓦罌歌

何物陶器如餅罌呀然腹大容百觥泥質粗澀模範古  
獸螭鑿鐫形猙獰圓孔有五穿其底舉以向日分光明

我疑此物靡所用江海豈庸漏卮盛私怪當年埏埴拙鑿破混沌殘其形藏此器者爲林氏閒嘗爲我言其情先人昔宦黃河側黃河千年漠然清閒眺河墻偶得之雖有其器無其名當時祇供兒童弄今日亦等鴻毛輕前年有客長安來博雅鑑古識最精因言此物名曰口

脣上

用鎮狂瀾息匈匈世間此類惟有三奇談真令俗耳驚我聞古有驅山鐸噲吆鞬鞳發大聲或置斷壁懸崖間千山響應齊鏗錚因疑茲物或禹製疏渝江河地效靈嗚呼於今此器亦安用吾山永奠瓠子平

筆筆有擒縱之力超忽離合的是歌行擅長不似元  
白諸公手滑也

牟默人

賭郎行

雍正間人陸鑑明江南府宣城縣諸生

陸家賢婦有焦娘嫁得兒夫是賭郎一擲曾聞連百萬  
傷心何意棄紅粧紅粧本是良家子十三嬌小學書史  
香閣裁成芍藥篇吟窗養就芙蓉紙方期金屋貯阿嬌  
誰料紅顏爲君死陸郎輕薄秀才家終朝團局作生涯  
窗下青燈常暗淡枕中白骨任撾擊是誰畱下陷人阬  
邪鬼不生世不成囊中金盡眠方穩榻上燈昏眼愈明

暮暮朝朝都不辨么么六六時相戀寒士曾無避債臺  
佳人屢脫黃金釧金釧雖亡何足悲兒夫浮蕩淚雙垂  
一局那能贏別墅千金豈有賭蛾眉錢神不媚酸寒骨  
骰鬼偏欺薄倅兒仰屋計窮猶技痒手中還作摩挲想  
博進負人積似山巾袍典盡嗚孤掌恨殺奸人黃黑心  
強將窈窕抵多金黃金有價人無價白璧雖沈志不沈  
本謂多情戀箕帚何期掩淚辭橐礮低眉欲寫心中事  
下筆難傾言外意粉扇題成絕命詩湘裙書就斷腸字  
溫柔敦厚繼風人悱惻纏綿動星使封章朝奏

九重天祠典新邀大表賢蕩子權爲香火使富豪罰以  
萬千錢斷指錐心甯云報綱常凜烈斗山懸森森松柏  
清風廟至今過客猶憑弔繡盤已自表千秋齋曰還應  
稱二妙黃池邨下漾愁津陸生黃池鎮人花草經年怨不春賭  
局風光還似舊芳魂月夜定如新殷勤欲問狹邪子可  
有深閨飲泣人

雁聲引

三秋之夕羣雁嘈嘈感人之處世有似此者聊  
爲賦之

我聞禽聲之中鶴第一其次無如雁聲清鶴唳九霄雁入雲所以一鳴令人驚塞上之草秋先白牛羊下山日將夕簷篥驚起離羣鴻沈墜悠揚音屢易天陰月黑風蕭蕭繁聲急響求其曹前者婦後者奴旣恐聲聞爲人覺復虞相失時相呼紅樹山頭葉聲乾叫起一片霜天寒此時離人泣下淚高樓半掩銀燈殘藁砌宦遊近何在聞說今秋客雁門絕塞秋深三尺雪雁來卻與雁門別幾經銜蘆到此間風餐煙宿應愁絕嗚呼孰能爲此區區稻粱食僕僕朝南而暮北獨不見華亭有仙禽朝

遊雲際暮深林瀟灑疑出塵塙外飲惟清泉啄甘帶長  
歌一曲猶未終濁然洗耳來松風

鐵樹篇

樅樹俗名鐵樹棲霞縣城之北太虛宮前夾道  
雙植自余童時僅存一枝壬子春初復遊其地  
生意盡矣恐遂湮沒興言記之

我聞鐵樹花開乙卯年此樹從來花杳然或言歲歲花  
常著未見其真語浪傳爾雅遺文曾所讀松葉柏身是  
樅木憶余總角遊此宮喜見一枝綠茸茸迄今曾未三

十載向之存者亦已空至元天子昔好道長春先生抒  
偉抱先生豈是黃冠流鼎沸雲擾無時休宋帝覆舟元  
定鼎飄然頓作陶宏景清心寡欲不殺人煌煌謨訓垂  
箴警太虛宮殿倚雲開先生旋賦歸去來花草皆含仙  
氣色懿此二樹新培栽根枝左紐與常異壺中日月誰  
復記一任烽煙迷戰場那知風骨帶仙香劫火雖燒終  
不死舊傳爲火所災惟一枝存挺然身如百鍊剛枯者亦終不朽殿  
瓦雨漂巢蝙蝠殘枝還向人間綠豈意消息如瓊花瓊  
花有日歸仙家柱礎縱橫委瓦礫宮垣冷落無煙霞迺

遷元明入我

朝五百餘年獨後凋嗚呼長春先生安在哉至元天子竟已矣世人那得身如鐵君看鐵樹猶如此

老少年歌

老少年草名卽雁來紅

君不聞秦皇漢武鬢毛斑日遺方士求三山馳想安期羨門子往來方丈蓬瀛間文成已誅五利死徐福入海終不還人世長生信無術何物小草駐朱顏秋花秋葉半顛顙籬落一枝血色殷翩若少女倚簾櫳燕支幾點映脣紅又疑白髮龍鍾叟強顏偷入少年叢昔日老來

辭楚歸嬰兒戲著斑爛衣何時披拂上秋草秋草居然亦賜絳靜之新煮肉芝熟童顏還如十五六更有夏姬得道年容華絕世老愈妍徐娘亦是多情種半面粧倚晚風前梧桐葉落橘柚老亭亭獨立斜更好世人勞攘鬢成霜顏如渥丹輸秋草我今對草發長歎求仙枉上蓬萊島噫嘻求仙枉上蓬萊島

龍洞山中多海棠欲詣不果歌以代遊

久聞濟南好溪山溪山深處龍洞巒蝙蝠如斗掠林間海棠開作珊瑚斑誰家女兒門朱顏人面花貌雙迴環

燕支雨浥紅裙殷餘香入衣散雲鬟有客有客殊閑閑  
未能扶筇叩仙闕重陽攜酒登高還斜日人影蓼花灣  
青峯江上絕塵寰空聞流水聲潺湲

上水石

千巖萬壑盆中閒造化雕鍛聳奇觀偶將杯水坳堂注  
淋漓濡染造其巔性本就下惟流溼孰激而行竟在山  
濃如經雨空翠滴潤似新沐黛痕漣麗譙層觀競吐納  
懸崖飛瀑紛鈎連陵夾有溟山有澗飲欲縱橫頃刻變  
迅如迸裂銀瓶漿豁如激射銅壺箭寒氣逼人渾似秋

置我一壑竝一丘石根鍾乳林麓透琪花瑤草春巖幽  
硯山奚足誇奇勝弱水真堪供遨遊安得追隨羨門子  
身入方丈蓬瀛洲

己酉下第後聞生子喜甚燈下醉賦時四月十二

日

長安滿眼杏花春愧我不是看花人浮名得失何足問  
天倫之樂乃其真況於此兒殆英物兆以吉夢符前因  
騎尾傳說星中箕摩頂徐陵天上麟奎壁居然論甲子  
姍提還擬降庚寅椿誥更喜侍堂前堂前喜見瓜絲絲

紅蘭茁芽旣抱子綠竹生筍兼娛親他年吾兒幸早達  
莫似乃翁空踐踐

捕蝗行

蝗來也蝗來也一片黃雲罨四野所過皆空地爲赭茅  
茨食盡餘屋瓦貪狼很羊似此者長欵短棒帚杈杷殷  
殷劄劄譙且譙兵丁捕蝗如捕虜父老捕蝗如捕虎兒  
童捕蝗如捕馬婦女捕蝗如捕鼠蝗一斗錢百五蝗一  
升二十許門隸盜錢不肯予予又逗邇肆嫚侮民不敢  
言而敢怒昨日客從鄰境聞具言蝗蟲能食人有嬰兒爲蝗所

啖

前日守土官堪訝具報蝗蟲不食稼一年旱二年水  
水說不逢雨甲子旱說不逢歲在己盜起託言非掠齒  
軍興諱言踐禾黍囚逸聲言空囹圄婦子槁餓官不舉  
羸瘦何堪痛篋楚昨已鬻男今鬻女秋成報歲滿籌筥  
滿籌滿筥復滿車不在民家在官家鋟銖搜取盡泥沙  
金鑽山積供豪奢官有祿民無穀窮檐二日一食粥蝦  
兵蟹荒稼不熟官蝗又來啖人肉蟲蝗助虐啄人粟蝗  
過所在旋生蠍更俾遺種茲邑育食我麥苗不食菽今  
年尙樂明年哭

反送窮用徐曉初韻

窮乎依我以爲重我非迎之何故送俸錢雖少官事空  
頗有風月資吟弄室無擔儲且減用每日兩餐有飯甕  
蘇詩注山東人埋肉於飯下而食之謂之飯甕此借用  
淡泊裁宜寒士供粗布衫子多綻縫破巾短髮任鬢鬆嬾散那期禮數中索債不  
驚春枕夢交游雖疎忽我懶妻任呼荆子題鳳有時唱  
酬共詠諷讀書何妨強忍凍窮乎依我若伯仲

李將軍三十韻

將軍閩產而浙宦生應於兵死遇難忠勤勇敢古無匹

惟馬伏波常百萬蔡賊小醜初跳梁跳梁未敢恣汗漫  
蠻封潰穴無堅隄蠻弩射人有覩而豈料蟠輒么磨蟲  
化爲鯨貌逞曼衍颺母風起舟船翻乘災利危肆强悍  
陽侯之神何不仁坐令凶殘久逆叛天生將軍海嶠間  
與賊同生共鄉縣同安芳蘭穢草殊薰蕕誓埽兇鋒靖  
海岸束髮從戎讀兵書妙選期門戴鵠冠出爲鎮將兼  
樓船腰中常懸大羽箭殺人如草殫威棱破浪衝鋒激  
閃電遂教一舉鷹鷗驅直使三洲鳥獸竄寥廓旗屢覩渠  
魁殲每獲乘舟始罔獻前年追賊出粵關彼已計窮思

逃散賊船高我船三尺仰首攻圍勢不便風吹削柿浮江頭駕駛揚飄制奇變更兼刀斗都森嚴十萬舟師總訓練所以兵過如擣虛賊望旌旗已股戰丁卯冬十二月下兵南澳伺賊倦乘勝追及黑水洋賊艘唯三更破爛火弩齊發俱延燒將軍身爲士卒先挂船正欲施殲擒誰料風颶起水渙人謂賊子游釜魚天哀將軍受鉛彈壯士盡哭都無聲搏膺呼天未厭亂嗚呼師捷身亦死求而得仁又何怨虎臣雖死猶如生眞剛原曾歷百鍊鼠子雖生魂已死不久身殘爲京觀死剉其骨揚

爲灰生割其肉作萬段李伯廟貌伯立賜謚壯烈廟同安縣垂千秋能弭灾兵扞大患

仙鹿謠有敘

刺淫也余遊宦京華前後十餘寒暑朋舊凋零存亡殆半或才名蓋代智略冠時而好竝登徒魂迷佳俠命懸朝露恩斷情絲可爲悼歎不敢質言聊託物情以資規諷庶言者無罪而聞者足戒云

鹿本禽中仙兼食九種草滋液儲靈根容顏故不老雖

能抱骨延千齡亦須嗇精愛三寶不然泡影色空身那有長生久視道谿父山間瓜安期海上棗莊叟逍遙遊

盧生蓬萊島忽然夢入溫柔鄉玉貌花顏嬵嬪好方言  
卷十

嬵嬪鮮好也

牝鹿思久勞精魂渥丹難駐類木槁恣情縱慾

喪其軀漁色獵香鹽汝腦身死山林間命難金石保覆以湟中蕉誰謂非壽考野人葬汝于庖廚老饕餕爾以醉飽脩短隨化雖歸天禍福已求命自造應由辨之苦不早君觀野有死鹿篇有女如玉哀窈窕

大氣奔放運掉自如是學少陵而得其神味者

趙鳳崖

胡竹巖郎中邀同戶曹諸子小集思豫堂觀劇是  
日甚寒戊寅仲春九日也

初春天氣多晴暄此日朝隱扶桑暾登樓披裘裘欲薄  
臨軒把酒酒不溫主人雅意爲敬客命具沸湯重開樽  
妙選歌童出四喜觀者如堵門如市嬉笑怒罵都逼真  
衣冠雍容非貌似始信千載以上人凜凜至今尙未死  
人生故者方爲陳何妨陳者猶爲新世態反覆難可問  
生氣奄奄如陳人灞上棘門同兒戲安知戲場非眞身  
眞與非眞兩不朽諸君莫停杯中酒

反明妃怨

達梅岑以明妃怨舊作見示愧無以酬因反其

詞以寄其意

宋書樂志有明妃怨李伯時嘗畫昭君圖韓駒爲序自是以還文咏

甚多各標新義今錄其尤者如宋劉子翬云西

京自有麒麟閣畫向功臣衛霍間王庭珪云不  
如夔州舊邨女三幅羅帶兩髻了元劉因云  
皇重色思傾國趙氏承恩亦亂宮自售懸知非武  
靜女漢家當論畫師功許有壬云和親納侮號

上策建議詒謀妻敬責吳師道云琵琶馬上

窮恨最恨當年誤入宮王思廉云漢室禦戎無  
上策錯教紅粉怨丹青明邱濬云當時不遇毛

延壽老死深宮誰得知

漢帝和親自失策毛君圖畫焉足責天心妬色如忌才

長沙遭斥朔方謫人彘鉤弋兩奇冤長門團扇永幽隔  
漢家薄德誰孤恩恩深終祇結仇隙始知遠嫁翻多情  
拜謝君王去紫庭燕支未減漢宮麝黛色常畱冢草青

古鏃韜筆

有敘

友人遺余銅鏃古色斑然蓋幾千年物也余壯  
其神武威棱而形體完具因彼空中作爲筆脊  
庶兼收文武之資焉

古皇寓兵在耕讀後賢出身別科目武夫投筆驅中原  
文士彎弓處白屋兩家正可共盤桓那論鋒端與筆端

要離伯鸞冢相望何妨同居不同量前年有客遠方來  
貽我尺書親手開其中一鏃三鐮具

方言三  
羊頭注云  
鐮者謂之  
鐮棱也

鄭重摩挲意屢猜精銅爲質形模古不是周秦卽漢楚  
疑從沙漠貫雙鵰飲羽或經穿伏虎當時戰場幾回臨  
血色斑斑尙可尋破的屢曾驚敵膽寒芒猶有殺人心  
殘戈折戟沈沙磧完然此器仍無易宣威久已著疆場  
策勳今復到文席回首殘雲掃陣橫累經百戰樹威名  
請將新息標銅柱移換頭銜付管城

運巧思於鉅手只覺落落大方

鮑雙五

翼兒順女以危危祠神云是古法余笑而從之爲

賦是詩時閏四月廿四日

兒女僬僬走奔忙我疑非癡卽發狂牲幣紛羅索衣裳  
云爲迎富降神香我謂此神不可逐就令要來恐無暇  
舉步不離富兒門抗顏甯枉貧士駕貪夫有言富不仁  
俗士猶道力勝貧腰金佩銀大如斗寒儒兩肩荷一口  
可憐韓君送窮文神若無見亦無聞借問神係何官職  
我亦不知復不識南陽有客燔黃羊滿家從此豐穰穰  
祠神亦自非荒唐安知禳田不倍償芻茭喚牛免喚狗

汗流且奔僵且走兒女莫笑顛狂叟也同汝曹拜稽首  
祝云自今歲其有噫嘻祝云自今歲其有

愁霖六月下旬雨至七月下旬

不雨自春到夏五草枯石爛盡焦土七月初旬霖復霖  
三日以往多不數我疑天公非不仁空教暑寒怨吾人  
風旣旦南而暮北雨何徹夜復經晨欲託靈蓬通芳訊  
今肯布施昔何吝萬斛水向銀河傾千顆珠跳簷澑迅  
中庭忽見方塘開我欲乘桴無取材空濛煙重失遠樹  
濃碧階滑綠蒼苔頽垣聲裂石砰磕老屋先憂勢將壓

漏痕經夕窺承塵溼暈明晨倒筐篋筐篋津透承塵穿  
溼薪蘊火寒無煙苦霖若待歲旱用人復何恨呼蒼天

五言律

秋日遊百澗山邨

犬隔疎籬吠人尋曲徑遙野蔬收白菔邨餉足紅椒俗名

川椒野人喜啖之日映葵花豔風輕柿葉凋何須武陵去此地

絕塵囂

秋日出遊晚歸

草際蟲吟苦林中倦鳥還殘霞猶在水落日漸沈山攜

菜邨翁急驅牛牧豎閒分明城郭近暝色有無間

### 山寺

蕭寺空山裏攀蘿曲徑尋茅庵依絕巘鐘梵出深林瓦落蜂巢結苔荒屐齒侵老僧無定跡來去白雲心

### 臨水

翛然臨水際幽興此中添翠鳥窺魚穴紅蜓立石尖波平苔散髮潭定鏡開匝何必濛梁想會心應不嫌

### 食蟹

磊落一何壯盤餐味少畱堅聳俗作聳誤憑利齒家釀出新

芻蕡破霜前橘紅分  
月下一橋底須窮一飽  
東海問蟾蜍

冬日途中卽景

朔氣忽淩兢雲山幾萬層  
陰崖多積雪淺水半成冰  
天迴雁聲遠地寒  
霜氣凝那堪迢遞路衣薄苦難勝

姑河曉渡

在萊陽西南經卽墨入海所謂姑尤以西者也

寒流尋古渡  
清曉發長隄  
霜重侵沙冷  
煙濃壓水低  
雁鳴驚曲渚  
星月落前溪  
難辨遠村樹  
冥濛一色迷

雪夜

日暮不知昏  
深雪擁門高  
天空色相大  
地一胚渾纔

覺霑衣溼旋思挾續溫子猷殊解事眠覺便開尊

寒食前一日懷幼弟允文

自別斯人後餘音久不聞書還存舊篋

偶覩遺書  
愴然隕涕草已

長新墳半載猶同席千秋各異羣春風寒食節桃粥一

家分

濟南道中

竟被虛名誤行蹤類轉蓬青山千里月黃葉一林風病  
謝相如渴途甘阮籍窮誰憐遊子意搔首送歸鴻

滌山樂

作泊

鄒平西十里先是一片水田芰荷魚鳥風景絕  
人近時堰以沙土水鄉竟爲原田又其地有墨  
王亭今廢詩以存其概云

墨王傳舊蹟澤國變芳塍山果空街落湖魚晚市登風  
湻饒古樸地僻絕巖凌但解邨中樂誰知問武陵

伏生碑

漢代傳經里荒煙訪故居身曾爲博士女亦識尙讀平聲  
書學綜五三後年過九十餘遺碑瞻道左摩挲重唏噓

牛山二首

榮華能幾許富貴使人愁不下此山淚誰爲孺子牛峴  
碑同雪涕羊叔自風流若戀山河美請君問爽鳩

千駟安能累百年更可憂山河皆帶感家國不生愁

春秋載公出田十有七日而不反晏子落日空山灝浮雲大野流蒼茫惟一

氣何處辨營丘

冬夜

漏斷人聲定城嚴夜拆敲參橫茅屋角月挂竹林梢枯  
坐蝸黏壁羈棲鵠失巢一鐙渾是伴閒數落花拋

除夕前一日

歲事行將暮星杓看復迴雪隨冬後盡梅傍臘前開折  
紙書門帖安芻灑東醅東君連夜至矯首上春臺

春初感懷

壯心殊未已愁思鎮相牽篝火燈殘夜春雲日暮天茅  
齋成坐隱詩卷當參禪早歲驚霜鬢余年廿八始見二毛終期雪  
此言

勵志

二首

白屋皆能貴青雲獨未通幻思春夢裏豪氣酒盃中書  
劍應嗟晚文章豈固窮丈夫須有立何得老桑蓬

不是貂裘敝甯將鵠印歸生駒經挫折蘊劒起光輝冬  
雪藏頭蟄春雷破壁飛從來流水少莫怪識音稀

正月廿九日東萊道中曉發

近海雲多暗遙山氣未青寒溪浸殘月深柳出疎星  
邨去二三里煙連長短亭誰憐多病客飄泊任流萍

曉渡蒲臺河

煙光分柳岸曉色入蒲臺近渡春流闊衝寒小榜開城  
連波影動人破水痕來欲效濟川用恐非舟楫才

夜渡蒲臺河

夜色滿河洲一篙離岸頭煙痕沈極浦燈影亂中流纔  
覺葦杭轉乍驚星斗浮依稀近古渡身已下輕舟

將抵家

半載長安客居然幾度春鄉音經耳熟山色與人親見  
面兒翻避間聲犬自馴入門心轉急不復正衣巾

甯戚冢

在平度州東

難挫英雄氣清商扣角歌鯉長溪漲水牛苗草緣坡風  
雨單衣臥星霜白石過身逢圖霸主猶自老巖阿

霜風何冷落孤冢尙樵燒始信眞賢達非終老牧樵燎

暉庭外動角響月中遙千載荒原上牛暝伴寂寥

渡淮河

卽灘水

岸平灘水闊擊楫渡中流影浸千帆樹波搖一葉舟宦情付秋水身事逐浮漚欲問囊沙處濤聲帶雨愁

秋雨夜坐

暗竹藏螢火空階咽晚蛩如何今雨夜竟絕故人蹤徑溼泥全滑苔黏屐半濃孤燈昏欲藥坐久意疎慵

雨過

雨過山如洗雲歸樹欲留忽然驚蟋蟀倏已入商秋小

草芟逾長疎花晚更稠習閒籬落久端不厭清幽

愛竹軒偶吟

愛竹開幽徑非關與世逃樹多嫌屋仄雲淨識山高  
學窺園董聊同運甓陶夜來疎雨過商意滿林皋

滸山濶

最是幽奇處萍蹤未及遊好山全入畫遠水更宜秋樹  
影藏游騎漁人聚小洲王郎讀書地見漁洋詩話到此重淹

畱

苦熱

夙有園林癖况經苦熱心任披羅瑟瑟終戀樹陰陰荷  
沼浮寒碧槐庭落碎金永懷濠濮上尊酒共棲尋

深秋晚景二首

蕭瑟度寒雁素秋行復過白沙潦水盡黃葉暮山多晚  
架收籬豆空場設雀羅前邨日將夕谷口下樵歌

滿目皆蕭索煙凝日漸昏草枯原野闊霜下果蔬存場  
圃餘麻母人家穫稻孫牛羊來已暮隱約入前邨

山行記程

四首

虎珀石

山石嵌凸巖穴窅冥兩山對峙北嶺之半有竅  
石色斑如昔人所稱虎穴者也其西稍高有蘭  
若形制古樸迤東而下茅舍一區僧徒居之山  
木蔚鬱楓楮甚多又有如皐莢而無牙者其草  
羅生石畔翠葉纖長蓋吉祥麥冬之類紅葉酣  
霜綠蘿抱石亦奇觀也余以辛亥初冬阻風雨  
其下興言記之

虎子何年去空山見虎斑風生洞口哨雲臥石根閒老  
木秋先瘦疎花晚更殷從今風雨邇不數二陵間

許家臺

邨臨絕岸地勢如臺是日阻雨宿焉

曲徑泥猶滑荒邨客暫停晚煙林色白山雨石痕青斷響餘檐滴烘衣向竈陘主人殊不惡對客話寒鑑

林家巖

邑人以山路險者爲巖讀音如線蓋近俗別字也廣韻集韻嶮音虛檢切是知巖

正文當爲驗

山形險峻盤旋而上行者難之巖之陰皆荒草

曲徑微通劣容足跡面壁而進視瞻勿回其陽

多苞櫟棘荆拉雜穿塗凡三四里始達平地

鳥道盤空上人蹤鑿險過衣防牛棘曳面苦石棱磨徑  
仄疑無地途迴類轉螺天從山際出何怪拂雲多

上崖頭

由林家巖數里路漸平乃見小邨

蕭條秋晚後慘淡雨餘天黃葉滿邨路青山多墓田外  
間人不到此處地尤偏颯颯風林過征途倍黯然

瓜田

草聚圓鍋舍瓜生方罈田間香來得得披蔓摘縣縣地  
僻知延客人漬不取錢龍驥與狸首入齒漱甘泉

蓮人 蓮子爲面殼爲衣

的白宜爲面衣青雅稱身胸中非有物足下是何人色  
相終成幻巾袍恰逼真浮生同過客夢繞採蓮津  
君豈有知者與生同一般居然真面目休笑假衣冠露  
墜花房冷煙深水國寒浮沈如我輩應作此人看

步和徐曉初七夕雨

良會動經歲覲時歡愛生獨憐游宦客長感別離情海  
國秋應早徐廣東和平人魚書寄未成遙知蕉葉雨偏向綺筵  
傾

次韻蘭園劉太翁年丈蘆筍詩

茅苗蘆侵岸聲喧鳴滿灘莫教爭嘶嚙畱取供盤餐味  
亞絲蓆胞鮮侔雪薄寒葭蒼秋色老吟徧幾千竿

七月望後一日雨中奉邀蘭園翁小酌疊前韻

檐溜未成瀑庭坳如下灘特來尋舊雨因便勸加餐味  
薄頻羞儉酒傾更畏寒烹鮮唯縮項新買釣魚竿

鮆魚  
頗新

鮮蘭翁亟稱之故及

八月一日雨中種諸葛菜

不是凡蔬品名傳自武鄉公非老圃輩我愛菜根香概

種畱鋤處攤泥趁雨忙思人猶愛樹珍重莫輕嘗

迎春花

春風如有待遲緩度芳辰花解逢迎意人餘嬾散身笑  
梅舒臘冷憐柳折腰新偃蹇應憎我韶華落後塵

孫男聯

蓀  
薇  
芬

校字

首孫國瑞忠國武同校字